

27-03-2017

Inatsisartut suleriaasiat § 37 malillugu, immikkoortoq 1 naapertorlugu matumuuna Naalackersuisunut apeqquut imaattoq saqqummiuppara:

**Naalackersuisunut apeqquut:**

- 1. Suna pissutaava utoqqalinersiutillit nunatsinni danmarkimilu assigiinngitsumik pineqarnerannut ? uffa naalagaaffeqatigiikkaluarluta.**
- 2. Utoqqarnik naalagaaffeqatigiinnerup iluani nunatsinni danmarkimilu assigiinngisitsineq inuit pisinnaatitaaffiinik aaliangersakkanik unioqqutitsinerunngilaa ?**
- 3. Utoqqaat aappariit tamarmik utoqqalinersiutillit Danmarkimi qanoq utoqqalinersiuteqarpat ?**

(Inatsisartunut ilaasortaq, Anthon Frederiksen, Partii Naleraq)

**Tunngavilersuut:**

Danmarkimi utoqqaat tamarmik utoqqalinersiuteqalernissaminnut pisinnaatitaaffeqarput, kinaaneq imaluunniit sumi atorfeqarsimaneq apeqquataatinnagu. Sooruna nunatsinni utoqqaat tamarmik utoqqalinersiutitaarsinnaanermut pisinnaatitaaffeqanngitsut ?

Tusartaannarparput utoqqarpassuit nunatsinniik danmarkimut nuuttartut, danmarkimi utoqqalinersiutilinnut atugassarititaasut pitsaanerungaarmata.

Taamaattumik soqutiginarpoq paasissallugu utoqqaat nunatsinni danmarkimilu utoqqalinersiutaannarnik isertitaqartartut, utoqqalinersiutaat qanoq nikingatiginersut.

Apeqquut inuit pisinnaatitaaffiinut tunngasoq, soqutiginassangaluarpoq taanna inuit pisinnaatitaaffiinut attuumassuteqartunit akineqarpat.

Ullut suliffiit qulit qaangiutinnginnerani akineqarnissara kissaatingaara.